

## SENSE

### Antifone di jentrade At 1,11

**U**mign di Galilee, parcè po staiso li a cjalâ il cîl?  
Come che lu vês viodût a lâ sù viers il cîl,  
cussì al tornarà, aleluia.

**Si dîs** Glorie a Diu.

### Colete

Diu onipotent, fasinus gjoldi di sante contentece  
e cuntun agrât plen di religjon,  
parcè che la sense di Crist to Fi e je ancje la nestre  
e là che e je rivade la glorie dal cjâf,  
li al è clamât a sperâ ancje il cuarp.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### O ben:

Diu onipotent, a nô che o crodìn  
che come vuê il to Unigjenit e nestri Redentôr  
al è lâs sù intai cîi;  
danus, par plasê, di vivi ancje nô là sù cul nestri cûr.  
Lui che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE At 1,1-11

**Si è alçât par aiar sot i lôr vôi.**

Dai Ats dai Apuestui

Tal gno prin libri, Teofil, o ài tratât di dut ce che Jesù al à fat e insegnât, di cuant che al à scomençât fin in chês di che al è stât puartât sù in cîl, dopo di vêur dât lis sôs istruzions ai apuestui che ju veve siezûts midiant dal Spirtu Sant.

Dopo de sô passion, lui si è pandût a lôr vîf, cun cetantis provis, comparintjur par cuarante dîs e fevelantjur dal ream di Diu. E biel che al mangjave cun lôr, ur à comandât di no slontanâsi di Jerusalem ma di spietâ li ce che il Pari ur veve imprometût, «ce che o vês sintût, dissal, de mê bocje: Zuan al à batiât cu l'aghe, vualtris invezit o sarês batiâts cul Spirtu Sant di chi a pôcs dîs». Cjatanse duncje insiemi, i àn domandât: «Signôr, isal chest il timp che tu tornarâs a meti in pîts il ream di Israel?». Ur à rispuindût: «No us sta a vualtris di savê i tîmps e i moments che il Pari si à riservât par sè. Ma o cjaparês la fuarce dal Spirtu Sant che al vignarà parsore di vualtris e mi sarês testimonis a Jerusalem, par dute la Judee e la Samarie e fin ai ultins confins dal mont».

Disint cussì, si alçà par aiar sot i lôr vôi e un nûl ur al strafuì dai lôr vôi. Intant che lui al leve sù, lôr a cjalavin fis il cîl: e ve che si ur presentin dôs personis a blanc che ur disin: «Umign di Galilee, parcè po staiso li a cjalâ il cîl? Chel Jesù che us è stât strafuît viers il cîl, al tornarà come che lu vês viodût a lâ sù in cîl».

Peraule di Diu.

### SALM RESPONSORIÂL dal Salm 46

**R.** Al va sù il Signôr fra cjantis di gjonde.

**O ben:**

**R.** Aleluia, aleluia, aleluia.

Batêt lis mans, popui de tiere,  
scriulant al Signôr in ligrie.  
Parcè che trement al è il Signôr des schiriis, l'Altissim,  
lui al è il grant re sun dute la tiere. **R.**

Al è lâs sù Diu framieç dai berlis,  
il Signôr compagnât dal sunôr de trombe.  
Dait sù cjantis a Diu, dait sù cjantis;  
dait sù cjantis al Signôr, dait sù cjantis. **R.**

Lui al è il re di dute la tiere:  
une biele cjante dait sù a Diu.  
Diu al à tacât a regnâ sui popui,  
Diu si è plaçât su la sô sante sente. **R.**

### **SECONDE LETURE Ef 1,17-23**

**Diu al à fat sentâ Crist a la sô diestre insom dai cîi.**

De letare di san Pauli apuestul ai Efesins  
Fradis, il Diu dal Signôr nestri Jesù Crist, il Pari de glorie, us dedi un spirt di sapience e di  
rivelazion par cognossilu miei. Che al ilumini i vôi de vuestre inteligence par che o podês rivâ a  
capî quale che e je la sperance de sô clamade, quale che e je la ricjece de sô ereditât gloriose framieç  
dai sants, e quale che e je la grandece spropositade de sô potence cun nô, che o crodìn, seont la  
virtût de sô fuarce invincibil

che lui al à pandude tal Crist  
risussitantlu dai muarts  
e fasintlu sentâ a la sô diestre insom dai cîi,  
plui adalt di ogni principi e autoritât,  
potence e paronance  
e di ogni altri non che al ven nomenât  
no dome in chest secul culi ma ancje in chel che al vignarà.  
Al à disponût dut ai siei pîts  
e lu à metût, sore dut, cjâf de glesie,  
che e je il so cuarp,  
la plenece di lui che dut, sot di ogni aspîet, al colme.

Peraule di Diu.

### **SECUENCE**

#### **SUMMI TRIUMPHUM REGIS**

Compagnìn la vitorie dal re cu la nestre laude;  
lui che, cu la vitorie de justizie, al à tes sôs mans  
i bastons dal comant dal cîl e de tiere,  
lui che si è dât vie a un presit une vore grant  
par riscatânus nô.

A lui i spiete un non convenient e gloriôs.  
Di fat al à scjavaçât cence soste dutis lis monts  
e dutis lis culinis di Betel.  
Dal cîl al è dismantât jù intun grim virgjinâl  
e di li tal grant mâr dal mont.

Dopo di vêlu navigât dut cu la sô potence,

al à dât l'assalt al scûr trement dal flum dal infier.  
Al à savoltade la paronance di chel potent;  
al à gjavât fûr di li une grande schirie di int  
e cul so sflandôr al ilumine il mont.

Il vincidôr al à menade daûrsi la sdrume  
di chei che a jerin tignûts presonîrs li dentri,  
e cussì, tornât in vite, al pues aromai palesâsi  
ai siei servidôrs e amîs.  
Vuê infin al à fat il salt plui grant,  
svolant par simpri sore dai nûi e dai cîi.

Il popul fedêl che al celebri duncje cheste grande zornade  
là che il Fi di Diu al à fat jentrâ cun lui,  
tes altis sentis dal cîl, i cuarps dai mortâi.

La int e spiete trimant il judiç che al vignarà,  
come che i doi agnui ur àn spiegât ai fradis.  
Chest Jesù che us è stât puartât sù in cîl,  
al tornarà a vignî, come che lu vês viodût a lâ.

Suplichìn alore ducj insieme cence mai fermâsi  
il Signôr nestri gloriôs;  
par che de diestre dal Pari, là che al è sentât,  
nus mandi il Spirtu Sant.  
Che al sedi simpri cun nô, fin a la fin dal mont.

### **CJANT AL VANZELI Mt 28,19-20**

**R.** Aleluia. Aleluia.

Lait e inscuelait dutis lis nazions, al dîs il Signôr.  
Ve che jo o soi cun vualtris ducj i dîs,  
fin a la fin dal mont.

**R.** Aleluia.

### **VANZELI Mt 28,16-20**

**Mi è stât dât ogni podê in cîl e su la tiere.**

Dal vanzeli seont Matieu

In chês volte, i undis disepui a lerin in Galilee, su la mont, tal lûc che ur veve dît Jesù. Viodintlu lu adorarin; cualchidun però al veve ancjemò dubis. Alore Jesù ur fevelà disint: «Mi è stât dât ogni podê in cîl e su la tiere. Lait duncje, inscuelait dutis lis nazions, batiantlis tal non dal Pari e dal Fi e dal Spirtu Sant, insegnantjur a meti in pratiche dut ce che jo us ài ordenât. E ve che jo o soi cun vualtris ducj i dîs, fin a la fin dal mont».

Peraule dal Signôr.

**Si dîs** O crôt.

### **Su lis ufiertis**

Signôr, ti presentìn cun umiltât chest sacrifici  
in memorie de sense venerabil di to Fi;  
danus la gracie che, cun chest incuintri di robis santis,

o podìn jessi alçâts a lis Realtâts dal cîl.  
Par Crist nestri Signôr.

**Antifone a la comunion Mt 28,20**

Ve che jo o soi cun vualtris ducj i dîs,  
fin a la fin dal mont, aleluia.

**Daspò de comunion**

Diu onipotent e eterni,  
che tu nus lassis celebrâ i misteris dal cîl  
biel che o sin ancjemò su la tiere, fâs, par plasê,  
che la devozion e l'afiet dal popul cristian a tindin  
là che dutune cun te e je ancje la nestre umanitât.  
Par Crist nestri Signôr.